

南

疆

逸

史

南疆逸史卷五十一

烏程溫睿臨撰

列傳第四十七

武臣

曾英

王祥

楊展

王興

陳奇策

蕭國龍

曾英字彥侯閩之莆田人從父宦遊成都父歿因家焉為人
倜儻有材武喜赴人絃急行賈劍南致數千金以施與壯士
士多歸向之號曾公子獻忠將犯蜀英與巡撫陳士奇有舊
請獨將千人當賊不許而以全蜀兵使羌漢總兵趙光遠率

之與賊戰大敗走漢中英復痛哭請兵士英不得已署英守備以土兵數百試之英盡散家貲市牛酒教練旬日士皆踴躍願効死會賊至瞿塘峽口號五十餘萬氣驕弗備英設伏擊殺賊阻險不得入與英對壘日夜挑戰英堅壁不出而多張疑兵於山谷每夜擊賊賊驚擾自相砍殺爭走山上觸飛礮死者無算凡守六閱月救援不至英與戰而賊退至五里望川關賊追砍其頰傷英殺數人隻身遁去張獻忠遂入屠夔門雲陽抵萬縣悉驅人民沈之江復從梁山趨順慶所過喋血以人肉為糧長驅入成都當是時蜀人皆思英曰曾公子而在吾不至此獻忠大索英有僧某高其義烈遇之以千金資英召募旬日得萬餘人裹創出戰賊於魚腹浦收復

重慶時王祥起兵遵義楊展起據為曹勛起黎州前大學士
王應熊亦起兵縉素師出達州道馬乾署巡撫事傳檄討賊
蜀紳前總督樊一衡前戶部郎中范文光舉人劉道貞或奉
詔或承制出師前侍郎余思恂與前四道王芝瑞奉王應熊
檄權宜措置兵食涪州道劉麟長往來主遊說袁韶武大定
各以兵反正生誠譚宏譚詣巫山劉體純鄧都胡名道金堂
姚玉林苑州王光興王有進呼九思各起兵討賊所謂夔門
十三家兵也夔州亦不從賊賊所拒者僅成都保國慶順一
路勢稍衰初賊去重慶不留一兵故英一鼓拔之復為國家
守王祥移兵綦江相與特角兵威大振而英以李占春于大
海為左右手前復重慶兵最雄獻忠聞之憤曰曾英不足畏

重慶要害地不可失命親將劉文秀率兵疾往占春迎戰于
多功城與大海天擊文秀大敗賊他將攻嘉定者亦為占春
大海所敗賊勢大阻英是時年二十有六玉貌錦袍戰輒先
登陷陣躍馬揮鋼所向辟易面赭美鬢髮賊望見驚以為神
衆至二十萬威名為遠近所服獻忠數不得逞謀下吳越而
未果者以英為之首也會

清肅王兵下漢中獻忠將劉進忠以保圍降王命士馬啣杖
兼程以進獻忠方營於西充鹽亭不設備鐵騎掩至獻忠被
擒磔死可望等引兵乘潰合師攻英於重慶英倉卒不戰中
矢投渝水死占春大海收殘卒二千奔涪州文秀遣其黨盧
名世疾取涪州占春戰敗大海在忠州知力不支乃放舟出

夔州巫峽入楚或曰當可望敗走英乘其亂以全軍出壓之
賊尚十餘萬爭路不得出除險遂與英殊死戰日暮大風雷
雨軍俱奔英且戰且走甲重墮水而死時隆武元年某月也
英部曲多歸晉王李定國軍中每言曾公子未嘗不流涕

王祥綦江人為人勇悍既從軍守九圍子隘張獻忠亂蜀惟
遵義一府未破督師王應熊及巡撫馬乾皆駐焉乃與監司
劉麟長王芝瑞等傳檄討賊而苦兵少聞邑紳刁化神以鬼
道募兵甚夥使涪將曾英襲取之英閩人與其部下涇陽李
占春項城于大海等均以材武稱遂復重慶王祥聞亦起兵
綦江相與特角應熊得祥甚喜奏為總兵官委任過於曾英
及孫可望潰兵過重慶殺曾英破綦江由遵義入黔而祥等

走永[圖]山中永[圖]二年應熊率呂大器代為督師可望入雲
南祥於永[圖]赤水間收復餘兵與戰賊之散亡者聚至數萬
人進攻遵義復之因拒其郡遵義古播州地饒沃而深阻祥
於其間撫流亡治屯田且耕且守蜀紳士避罪者多歸之戶
口充實祥於是獨雄於諸鎮廵按御史錢邦芑上其狀詔封
祥平寇伯祥甫得一郡未有平寇功也而封號遽與前曾英
等一時以為榮李于等勿服也會袁韜方與占春爭長治兵
相攻祥惡占春之強思與韜合一日誘占春計事伏兵執之
占春殺守者而逃於是諸鎮日尋干戈矣是時蜀中北逼
大兵南畏孫寇諸鎮惴惴守土不暇顧不覺悟反相殺賊是
以皆底於敗先是總兵皮熊者從廵撫范鎮守貴州孫可望

之入寇也熊不能禦敗於烏江走平越其後自平越收兵復
貴州破土賊藍二等以功封定番伯至是遵義饑祥赴黔告
紹熊不與遣郡卒奪其資祥怒舉兵攻熊不勝而還熊因奏
祥不奉天子詔有兵不以禦寇而擅侵內地是賊也請約諸
鎮會計諸鎮處荒殘境羨遵義殷富思劫之久矣見其檄大
喜各率兵攻祥大小十餘戰不能克祥使人聯和皆罷去惟
黔兵深入相持月餘兵老乏食熊子又英年少不習軍士卒
氣益衰乃引軍引祥悉銳乘之熊兵大潰死烏江者三萬餘
人祥亦上疏自理上乃使使和解之會盟於烏江罷兵脩好
於是思南銅仁涓潭諸郡邑皆歸降祥祥盡禮於蜀紳蜀人
之仕中朝者皆言祥雄武皆大用乃進封祥忠國公熊亦進

封匡國公亦藉以為西藩障滇寇焉孫可望既而請王封不
得而怒庚寅春使李定國白文選大出兵由雲南趨貴州皮
熊度不能支遣使請盟不許走清浪衛總督范鏞入臣於可
望可望遂拒有黔中地皮熊徵土司兵三萬出平越復為馮
體禮所敗乃入烏羅司文選追執之釋不殺其秋文選將三
千人赴永甯將攻王祥守將侯天錫迎降詐以危言報祥曰
滇兵二十萬已度烏江來矣不如先期避之祥懼召諸將與
謀將軍李定者驍勇敢戰衆服之定曰二三年來操戈同室
雖捷亦恥今發兵討賊復有何疑勝則國之福也不勝不失
為忠義鬼定願率死士為前驅祥猶豫不決私計自真安州
入彭水拒險守隘引李于為助猶足自立乃裹其幣帛金寶

作竹夾三十背使牙將負之先行定頓足歎曰百戰基業寇
未至先自敗鼠子何足計大事乎將士多送款於可望可望
疾發兵掩擊之祥倉卒夜走牙將之負資者先逃比曉並失
妻子從者僅百餘騎追者至祥率數十人持短刀戰殺百餘
人力盡自刎死明年可望下涪州李占春戰敗與于大海俱
入楚降皮熊有壻張默為水西宣慰司安坤師可望賊熊往
依馮壬寅吳三桂破水西坤敗並執熊及默熊年已八十餘
矣抗節大罵絕食四十日而死滇人哀而殯之

楊展嘉定州人崇禎辛未武進士為川鎮中軍成都之亡諸
將皆被執將斬展有力善泅水夜並脫其縛入江中逸至嘉
定見曾英等起兵展亦入捷為殺偽令以起事州人開門納

之時蜀地殘破歲復大饑

大兵既誅獻忠不能留諸舊將稍稍出收復保聚嘉定近省而險屢復善於撫衆遺民及潰賊相率歸之衆至數萬人先是張獻忠之去成都也輦金銀沈諸江有知其處者以告展使其壯士乘巨筏探求之數日獲大鉞以巨萬計時斗米三十金流茅戴道屐乃遣使百輩赴黔楚告糴前後得米數十萬石自鄉先生以及弟子員具贍資送其家農民給牛種口食使擇田而耕壯而願從戎者補五月與米銀使操兵戰百工雜流各以其藝就食孤貧無告者康之蜀民賴以全活者甚衆是年秋大獲士庶始有更生之望愛展如父母蜀人走四方者迭展慈愛未嘗不流涕也而展亦以是雄視諸鎮粵

中聞之封侯華陽伯得錫予視他鎮有加永熙二年也展既地廣兵眾然性矜尚文雅不務攻戰又泛愛不擇人至引賊自助卒為袁韜武大定所殺袁韜獻忠別部也出沒川東北山谷間其黨十三家號姚黃賊所遇焚殺與獻忠等王應熊招降之授副將使守順慶武大定有材武見稱隸總督孫傳庭標下及國變與孫守法聚深南山中

大兵至戰敗走興安守法死大定入蜀歸於巡撫李乾德令與袁韜攻入佛圍關守重慶未幾袁韜與占春爭長治兵相攻而重慶兵多食少乾德乃遣人說展與合兵展大喜與袁武約為兄弟居之犍為給供資裝日相望於道久之不能無忌也而展與占春故交好通問如初袁武大怨望乾德屢諷

展經營西北展不能聽乾德遂謂展慢已而袁武驍勇足恃
袁武心艷展資知展失乾德助益曲意事乾德遂共謀殺展
並其衆會袁韜生長展親賫金幣上壽並以牛酒犒師袁武
治酒高會展以甲士五百人長刀自衛甫入重門問犒五百
人酒醉而礮馬坐上擒展囚之別室尋殺之藹之欲圖展也
其妻流涕諫曰我軍流離饑凍非楊公衆且散矣負人大功
鬼神且有冥誅必不可勿聽乃陰遣人告展展勿信故及於
難及展死韜妻亦自縊韜發兵圍嘉定諸將奉展妻及子景
新嬰城守久之城中饑困諸鎮發兵救嘉定皆敗去於是內
應者以城降其妻縊景新北走而展士馬財賦盡歸韜大定
矣衆論俱不直李乾德朝廷下詔切責乾德問展死狀兩營

分展財不及乾德乾德亦悔恨庚寅孫可望拒黔將魏蜀乃
為展訟寃聲乾德及袁武等罪遣兩軍王自奇將一軍由川
南進別遣精甲萬人由滇渡金沙江踰大小象嶺過大渡河
出黎州以襲其後劉文秀將之袁武不知也方思力戰於州
南月餘文秀兵徑入嘉定袁武還師以禦王自奇尾擊之遂
就擒乾德沈水死

王興字電輝恩平人以殺讎亡命易姓名蕭嘉音為人短小
精悍任俠好施得諸惡少死力會御史連城壁兵至新興興
眾疑而擊之殺五百餘人城壁厲聲責以大義興聞之大驚
曰此朝廷繡衣使者若輩無知至此奈何乃單騎造城壁伏
地請謝罪遂迎城壁至其營張樂設飲三日剝血為誓會有

他盜謝家者要掠高雷運餉數萬興執家斬之獲餉直詣撫軍撫軍異其事授以官由是興以勤王為任城壁疏聞於隆武授副總兵命城壁監其軍而鎮守陽江陽春兩縣丙戌冬唐王聿錡僭立密使人說興西出梧棲擊三營許酬封爵興以大義拒之廣州陷邊保恩平山中佟養甲以書招降弗聽遣兵合攻興伏而敗之殲其將焉遂入恩平養甲謀使朱厓勳黎從合浦西走南甯促永順興知之出攻羅定陽春以制其後而乘間襲復陽江隨攻電白無日不與

大兵戰大軍苦之戊子李成棟來降上在肇慶城壁上其功詔興入朝晉都督總兵官賜蟒玉還守陽春陽江恩平開平四縣庚寅春廣州被圍以興挂虎賁將軍印率兵同衛臣馬

吉翔李元胤等赴援興次三水道遇

大軍斬獲百餘人奪餉數萬上之戶部廣州守將杜永和忌之過弗使前廣州再陷興運至陽江會永和亦至舟資器仗盡為所奪乃率衆入白泥若尚可善取繼茂二王招之興斬使焚書已復書曰朝廷用我以名我報朝廷以實朝廷用我以實我報朝廷以名今尺寸之土朝廷之名實在焉必死以爭之

大軍攻之踰兩旬力懈興以五百人分伏斬級千餘得馬騾數百甲午五月復廣衛城殺其將張登榮八月九日李定國兵下高涼興為前鋒旁收諸縣從攻新會先登定國敗績興乃駐軍文安築壘建倉廩為持久計宗藩唐王聿錡郡王郤

城新安及縉紳朝士多在依之興一遇以禮資給咸豐徵婚者為出羔雁欲去者為具行李時上在雲南海上出入詔使興為東道主又數使姪懋功與黃珏假道交趾貢金銀布幣諸物十三年春可喜發兵五萬攻之以巨礮環壘百丈垣附將登興抵濠而伏弩火器飛礮石擊死精騎七千餘人又陰毒四山水草密布竹簽蒺藜士馬飲者踐者多腸脹蹄潰相持三月海陵將軍陳奇策帥師來援解去蠟表告捷加興縣伯丁酉境內薦饑興發糧儲以賑

大兵乘窳驅民夫十萬水陸合攻文安地窪下四際滄水困巒傾陷難以馳驟遂張兩翼為寬圍遠斷出入欲以坐困之久之城中食盡興令兵民散出就食時升米二千錢一鼠錢

百丈雖餓羸無去者興私謂其弟曰城可恃而食不支天也
我終不降弟善撫諸孤以續先祀吾死且不朽乃密斷大棺
一具藏之戊戌八月城將陷可喜使使來招望日之夕興命
將士嚴守陴興妻張氏朝服及諸妾北拜謝恩置酒相訣張
氏與妾十五人皆自縊興舉火自焚比燒

大軍入視興與妻妾十五人骸骨暄然乃取所斷大棺合殮
之時興年四十五是役也

大軍將帥死者三十餘人喪兵數萬馬五百七十餘匹圍凡
十有三月可喜義之迎喪葬於廣州之河南懋功以參將固
守文安文安既陷與監軍副使黃珏總兵鄭球參將李玉分
拒隔水南廳上下兩川相為聲援庚子七月隔水南廳亦陷

懋功走雲南中道被執死之珏字磊嶼新會人初奉其父兵部尚書公輔起兵新會殺知縣戰敗匿山中久之潛詣永甌投兵部司務從定國軍理餉有方後入文安若數為興奏事貢御物著有勤勞玉閩人興戎旂親將數有戰功全髮不屈死

陳奇策字鴻碩南海人初由邑掾為遊擊羅明受記室從至贛州總督萬元吉授以守備廣州之陷修養甲得之使管肇慶水師從李成棟來歸仍守羚羊峽口戊子冬上謀誅養甲陰令奇策於楊柳沙擒殺之庚寅廣州被圍奇策帥師奔赴援與諸軍皆會山水為杜永和所阻不得進廣州陷奇策退拒下川數往采虎門洋嶼之間出奇邀

大軍屢有首功晉海陵將軍癸巳春李定國兵臨肇慶分攻
四會廣圍並克之奇策率兵接戰應直抵山水渡軍以赴廣
州

大軍以戈船扼大路峽口而奇策攻之斬級千餘還還下川
定國解去甲午定國復至攻下高雷廉三郡嶺西盡復九月
進圍新會奇策帥舟師先

大軍襲擊斬將蓋一鯨於江門焚其大艦數十又擒副將梁
大刀檻致軍前定國大喜使為舟師都統屯江門柵築礮臺
以絕聲援

大軍窘甚城中兵民相食會救至定國戰敗仍還下川先是
高州之戰

清總兵郭虎敗走高明以衆三千降定國分置奇策舟中虎
潛逸去奇策命諸軍圍殲其衆麋鹿劉良興來攻奇策設伏
擒之全軍皆沒丙申

大兵攻文安寨奇策往救轉圍下川大戰七日以西洋礮擊
傷數百人

大軍退走奇策念下川地小雖與隔水南廳海陵諸寨交連
然密近

大軍終難以一鄉抗兩王全省之力聞靖氛將軍鄧耀拒海
欽州之龍門島孤懸海外界接粵西隣交趾通滇南思與耀
合兵西附定國東通成功以張聲勢彼雖強盛終不能直泛
巨海千里之外以爭此葦爾因移師與耀合耀高州人隸海

康侯李明忠麾下明忠死耀將遺衆保牙山牙山陷乃走龍門龍門雖邊裔絕島獨存明朔衣冠避難者多依之郡藩宗室部曹監司守令以下恆數十人定國既敗餘兵多走島上軍聲日振裝船繕甲煮海屯田以為恢復之計奇策初至耀甚喜為治營具資儲約為婚姻久之嫌疑勿能和協耀乃具舟送奇策往上思舟州道出南窗廣國公賀九儀素聞奇策名待以客禮使鎮永淳將聯絡土司出復欽州會

大軍攻雲南九儀往援奇策以孤軍難支仍返上思入十萬山中欲走交趾

清總兵粟養志襲之倉卒交鋒士卒疲餓數百人同日戰死無一降者部將數十人與錦衣衛指揮僉事葉英欽州知州

陳首功皆死奇策被執至肇慶總兵董某邀見執禮甚恭二
王亦優待之奇策殊不為禮在獄一年每日衣冠端坐臨命
知府其棺衾祭物乃迎之出奇策方巾白袍雍容步履索胡
床踞坐笑而受刃傾城感歎私焚指帛奠之庚子五月也英
南昌人字干元首功字岷生建國人士武進士

蕭國龍字沛卿陽江人初為虎賁將軍王興副將從興攻復
州縣視師閣命郭之奇疏其功授驃騎將軍李定國師至
國龍請為前鋒力攻新會不克既退奉興命鎮永豐若與文
安特角己亥春秋文安陷永豐被圍國龍以眾寡不敵佯降
我師既退遂約水陸義士亨峒陳奇新白頭胡洪彪舊海萌
周祥古城勞奏雷門鄧雄雙水鐘良等同起可喜大發水陸

兵遣由上下川陡門海陵分路夾攻遂薄永豐相持兩月官軍監發火礮益馬步數千濟師先攻田顯萌渚若孤其外援奮戰兩晝夜遂陷國龍焚其家以餘兵保礮臺或勸之降曰虎賁不得有文安國龍豈得有永豐哉天亡文安所以亡永豐也今以永豐並文安以國龍並虎賁天之所亡我者不亡矣吾妻子已焚亦以並虎賁之妻妾十有五人也虎賁其望我矣其弟國麟中箭死國龍遂赴水死中軍余達子被執不屈植其皮以死一時之羽翼者若陳奇新洪彪周祥勞奏三瀧黃浦之夏應昌雙水之梁逢泰梁國炳武定屯之王尚忠雙龍之節允元錢岡謝邊若之何亞武與上下官田之杜健團練者卒戰沒無遺明兵死者前後二千四百餘被執二

百餘蓋高肇兩郡接壤地奧山深而兵得因緣屯聚其諸士
民不削髮者亦往往乘間相依云

南疆逸史卷五十一

大興傅氏長恩閣鈔本

南疆逸史卷五十二

烏程溫睿臨撰

列傳第四十八

武臣

李定國

劉文秀

李定國延安人少與孫可望劉文秀艾能奇俱從張獻忠為盜獻忠兒畜之因冒其姓獻忠僭號於蜀置四將軍可望曰平東文秀曰撫南能奇曰定北而定國則安西也獻忠死可望等潰至重慶殺曾英南走綦江入貴州破定番四人相與謀曰明德入人心久矣李闖入京稱帝而不終今蜀事又不成是天未厭明德也我等何可終踵敗轍蓋相與反正扶明

洗去賊名乎乃惟壇而盟復本姓尊可望受約束聞黔國公
為沙定洲所逐詐稱焦夫人弟所請兵為黔國公復仇破曲
靖至楚雄敗楊畏知釋而禮之畏知說以止淫掠禁屠戮招
沐天波歸賓禮士大夫聽朝廷命可望乃許之發兵擒沙定
洲略定迤東西是時永_隆帝新立國受兵故可望等得於旬
月間扼有滇黔二省入居雲南兵勢大振故御史任傑滇人
也倡義稱可望為國主設六部鑄興朝通寶錢以干支紀年
可望大悅羣賊本起等夷以一時無主推相統屬非心服也
定國尤崛強心非任傑議每事相牴牾可望怒因他事執定
國於演武場杖之百既復起持定國而哭曰吾以大義辱吾
弟願弟改心共濟大事勿相戕也定國再拜謝由是恨可望

己丑畏知說可望歸朝受封爵庶可服來可望因遣畏知奉表請王封廷臣執不與久之始封可望景國公賜名朝宗封定國康侯名如堵文秀置侯名若銚能奇某侯名時泰遣大理卿趙昱往滇而潯鎮中軍胡執恭己先矯詔封可望秦王可望大喜儼然以秦王臨其下矣畏知還始知其偽恥之復遣御史瞿鳴豐入朝欲實得秦王封而遙以兵威挾制朝廷大學士嚴起恆等執議如故可望恨甚辛卯遣部將賀九儀賊殺起恆等於南甯上下震駭是時粵東西已夫瞿何諸公皆死陳邦傳等出降國事愈不支乃真封可望為秦王可望既受其封迎上入安隆府以兵守之歲給銀八千米百石而已錦衣衛馬吉翔內侍龐天壽私通款可望議受禪可望度

衆心未附而止乃駐貴州大造宮殿署百官以明臣雷躡龍
范鏞任傑程源龔彝朱運久張重任方于宣等為宰相九卿
科道翰林等官躡龍等皆起家進士受朝廷顯秩至是皆導
可望以僭逆而方于宣尤指諛為可望起朝儀易印章立四
廟制鹵簿九奏萬舞之樂具俱偽史稱獻忠太祖頌為湯武
而指懷宗為桀紂可望覽之曰是亦太甚于宣曰不如是不
足以紀開創之勛聞者駭焉上之未入安隆也可望襲執皮
熊殺王祥而張先璧馬進忠等皆由雲南入黔歸可望矣至
是由遵義北擊于大海李占春於重慶敗之遂有川東而遣
王自奇劉文秀分道取黎州及嘉定走袁鼐擒武大定而留
兵守川西其明年壬辰

大兵入蜀白文選遁回雲南可望乃使李定國馮雙禮由黎平出靖州馬進忠由鎮遠出袁州沅會於武岡以圖桂林步騎八萬劉文秀與張先壁由永圖取敘州白文選由遵義取重慶會於嘉定以圖成都步騎五萬疏請封定國為西圖王文秀南康王時能奇己前死餘各加公侯五月定國進攻靖沅武岡皆下之由西延大埠疾趨廣西遂陷桂林孔有德自焚死執陳邦傳等送貴州劉文秀白文選亦陷敘州重慶大兵還救文秀全軍俱覆可望奪其王爵命回守雲南九月定國北取永州衡州楚粵之間舊將胡一青趙印選馬寶曹志建等屯聚粵西山谷間皆相率來歸民間亦多嘯聚以應之不復受可望節制可望怒乃自至沅州使白選文張虎攻

陷長州殺總兵徐勇湖南猝不意兵至郡縣皆奔潰十一月三日定國與

大兵戰於衡州城下不利會主帥遇伏死定國得收兵還屯武岡可望聞其狀將因以為罪而殺之召至沅州計事定國辭不行明年春徑回廣西可望愈怒自率兵追之

大兵聞可望退進兵寶慶與可望遇於花街子望見可望龍旂盡銳攻之殺傷相當可望忽退諸營見龍營走遂潰惟馮雙禮一軍不動

大兵襲衡州之失亦不追各引還以武寶之間為界上時在安隆困甚聞定國拒有廣西忠勇且與可望有隙與大學士吳貞毓等十八人謀密召定國入衛以制可望許封晉王賜

以屏翰親臣圖章遣使飭諭定國情辭哀切定國讀之感泣
軍中皆流涕願念兄事可望久且其兵尚強未可輕舉也可
望聞之遣將至安隆盡殺與謀者以定國方將兵在外益厚
撫其妻子冀收其用定國亦防可望襲之出兵由賓州南掠
廉雷五月陷高州及陽春陽江思平諸邑進圍新會明年
大兵合擊之定國敗走邊守南_圖劉文秀在雲南詔召為大
招討都督督諸軍出師東伐文秀具疏辭不許乃出按沅靖
諸營慰勞軍吏十日而畢文秀於諸人稍恭順慕文正親禮
儒士嘗曰皇帝猶佛也吾儕當構玉宇安之乙未十二月可
望聞定國在南_圖勢不振遣總兵張明志剛有才等襲之定
國大懼記室金維新曰王無患焉明志等雖盛皆王舊部卒

必不敢相敵今我疾引兵從間道出其後彼必驚潰我乘勝
入安隆迎天子入雲南大勢在我秦王無如我何也定國然
之內申春二月率其將高文貴自歸朝趨田川出關有才軍
後猝乘之有才跳身走軍士悉降定國疾走安隆可望偵知之
亦遣白文選至安隆移上入黔太后聞之哭從官皆哭文選
不忍乃還行以俟定國數日李定國至即奉上由安南衛西
入雲南可望遣兵邀之定國已抵曲靖時文秀與王尚禮王
自奇同守滇文秀亦素怨可望聞定國將至佯與尚禮守城
而私以數騎馳迓定國曰我輩以秦王為董卓尤恐卓後復
有曹瞞定國指天誓文秀與定國文選同奉上入雲南居可
望府中封定國晉王文秀蜀王文選鞏國公餘將吏俱陞賞

有差使文選還慰可望可望辱文選兵然以妻子在滇未敢
公為逆也復遣文選入朝與定國議和明年五月上使張虎
送可望妻子赴貴州張虎可望私人也定國故遠之故遣之
去臨行上召見勞之曰秦晉和好藉卿之力還當爵卿以公
因拔金簪賜之曰以是為信虎至黔即勸可望內犯且曰上
命以金簪刺國主可望既無內顧憂又聞虎言方于宣等復
贊之遂發兵反是時廷臣大半仕於可望者而可望腹心將
王尚禮亦在滇與龔彝等許為內應諸鎮從定國者皆傷殘
之卒而文秀所留滇兵亦少然人心不直可望馬進忠馬維
興馬寶以同姓相密又與白文選交皆密謀助定國而可望
不知也諸將先從容說可望使還文選兵可望信之八月朔

乃以文選為征逆招討大將軍總統諸將前行馬寶為先鋒
自率大軍隨其後合兵十四萬人馮雙禮守貴州馬進忠以
病留安順定國文秀亦自將至三岔拒之八月詔削可望王
爵九月朔可望至交水列三十六營去曲靖三十里定國文
秀相顧失色文秀欲走交趾避之定國欲由沅江景東取土
司議未決初四日文選營抵三岔輕騎奔定國軍具言人心
內向可一戰走也定國大喜請封文選為鞏昌王可望聞變
欲還馬寶佯怒曰吾乃為跋賊所欺要當手縛之生食其肉
文選為賊時常戰傷足故云乃選曰一人去何足重輕而以
廢大事耶可望乃止曰兩酋齊出會城必虛令寶與張勝武
大定選精騎七千間道襲雲南而身與定國決戰寶陰告定

國促令速戰而身徐行使城中得為備十九日定國會戰兵
既交文秀騎將李本高馬蹶被殺文秀欲退文選怒曰衣勝
已前往吾若還腹背受敵蹂為肉泥與其死於走孰若死於
陣乎率所部五千馳之馬惟興勒兵不動開陣以迎文選合
軍反攻可望在高阜見之大驚曰諸將皆叛乎遂走定國率
諸營乘其後可望大敗奔貴州定國令文秀追可望而身還
師張勝至雲南王尚禮己為沐天波所拘不得發勝知有備
又聞可望已敗馳還至揮水塘遇定國兵殊死戰馬寶倒戈
促之遂被擒十月望可望至貴州馮雙禮誅之言追兵將至
可望入城繫妻子北走雙禮斷後盡掩其子女輜重至偏橋
隨行只二十餘人所過鎮將皆閉門不納乃走長沙降於經

略論功封雙禮慶陽王進忠漢陽王惟興寶等封國公其黨
附可望者皆降級誅張勝張虎王尚禮自縊於是定國與文
秀並居雲南而事權專歸定國定國素以勇猛稱其出兵楚
粵也連陷十數城害兩王子其黨益嚴憚之定國性抗直與
人無私曲回滇矯可望失事上盡禮進奉極豐不以威交士
類人以此多之然計慮籌畫不及可望既柄國任用記室金
維新官至吏部右侍郎馬吉翔復以諂佞入內閣羣小爭趨
之舊人失職多怨望於是王自奇關有才等相率叛誅戮頻
行勢亦漸衰矣可望既降封為義王欷藉

大兵以報怨因獻滇黔輿地圖並陳其進取狀戊戌春二月
兵兵由蜀楚粵三路入黔定國使劉正國揚武等守三坡紅

關初定國所收可望諸軍謂之新軍而已所部謂之新舊軍
賞賚獨握趙印選胡一青滇宿將也亦罷問不用以故新軍
不附及

大兵至盡還守四月二十四日文秀病卒貴州陷

大兵遂入雲南七月定國受黃鉞與馮雙禮等守盤江拒雞
公背文選將四萬人守七星關其冬蜀兵出遵義由水西入
烏撒文選懼棄關走霑益而廣西土司之降

大兵者導以入安隆襲盤江之後定國拒戰於羅茨涼水井
連敗遂遁走永昌報至上出走己亥春三月

大兵陷雲南鎮將胡一青等降上至永昌下詔罪己定國還
黃鉞待罪自請削秩不許二月文選敗於玉龍關上入緬甸

定國伏兵於磨盤山磨盤山者越潞江二十里山谷峻險林木茂密仄徑屈曲僅容單騎

大兵窮追二十里不見一兵以為定國已去遠矣及過潞江前馳遇伏不利有俘卒洩定國謀乃分精甲先蹂伏卒定國出兵大戰不能勝走至銅壁關結營招聚散亡使高允臣先馳報上為緬人所殺不得違定國率眾駐孟定土府磨盤山之戰定國本期又選前後夾擊而又選自龍關敗後由沙木河出右甸鎮康道遠不及與戰至是聞文選在木邦定國移兵南島與之會見文選而相尤文選不悅及議所向定國曰緬小邦也猝見大軍必驚懼懼而思逞必拒戰戰則是與彼為讎也何以托我主不如擇近境險要地休兵息士脩軍實

招潰敗兩軍相為犄角而緬外憚吾軍必不敢無禮於主上
矣且雲南瘴暑敵騎不敢久駐及其敵也可結連諸土司以
為後圖文選曰主上望援久矣若俱在外則在內者何所恃
不如我入護主王任外事遂行由錫箔磨盤入緬定國知文
選之不和也亦移屯猛緬數月兵稍聚沅江土司那崙與降
將朱養恩許名臣高應鳳等起兵謀應定國吳三桂移兵滅
之定國方與孟良構兵勿能救也定國勢已敗見其黨多降
益懷猜忌賀九儀自南甯間道來孟良三桂拘其妻子以招
之事覺定國伏甲召九儀飲執而杖殺之散其兵皆怒裨
將何起龍率之入滇降白文選抵雍會江使人先諭緬使者
被殺文選怒因渡江擊之大敗緬衆緬人偽約和而陰召兵

兵既集以巨礮擊文選營文選不能支其糧遺面見定國李定國曰惜乎前不用吾言今仇怨已結在彼者危矣乃與文選俱發自孟良分道入緬定國由左文選由右時庚子九月也期與冬會於洞武道乏糧士馬死亡大半定國至洞武見沿江船議遣別將分兵渡江赴楮硯迎上而自率師攻阿瓦以制緬使不得出師爭靳統武曰我兵少分之力愈弱不如全軍攻緬緬破必送主上至軍求和乃進師敗緬兵於瑞羊岳阿瓦緬王城也三面阻江一面通陸自文選兵至後並鑿之引水自湖留提三匝置木城其上定國抵南噶喇江為浮橋以濟使人諭曰苟送上出我則罷兵緬首不應辛丑二月乃進屯洞泊離緬城八十里文選屯象腿離緬城百十里緬

人先守木城及西軍未逼乃更於外立木城出兵以守明日
兵復立前更立木城如是數四漸逼定國營乃大出兵與定
國戰驅象為前隊定國戰不利文選赴之兩軍合擊大敗緬
兵然暑盛士馬渴不能追緬仍入城以守定國優禮所俘緬
酋令還諭送上出緬酋計曰彼兵疲食盡無奈我何不如留
天子以為市終不聽乃謀渡江向赭磴前洞武船皆已藏匿
使部卒入山伐木造船復使人守江橋其下饑疲自相攻殺
遂散定國計亦窮至八月亦有冗水之禍從官盡死上亦幾
不免定國聞之以十六舟渡江擊緬不勝覆五舟乃與白文
選俱引還洞武至黑門坎文選軍在後其下勸之出降且曰
晉王不可信不見賀九儀乎文選乃引而北定國覺之使其

子嗣興隨文選以觀去向文選部下勒兵將戰定國遂使召
嗣興還曰吾昔同事者數十人今皆盡矣存者吾與白文選
耳何忍更相殘且彼既背主他出欲自為計念已絕矣吾所
以使爾隨之者冀其生悔心或可併力今大義已乖任彼所
之吾自盡吾事耳遂率所部東向九龍江而進而又選卒降
於三桂至十二月緬人獻永曆帝於軍前定國在九龍江聞
報東走景線壬寅五月至孟臘車里國境也三桂恐其走交
趾遣提督張勇追之而定國已病乃置醢自述平生所為且
曰如天已絕明命尚逢子死毋徒苦軍士未幾而帝崩問至
定國慟哭發喪命軍士編素然病愈不支六月二十七日卒
於軍其部將靳統武亦死餘皆散子嗣興不能軍八月亦自

慢怯降與劉文秀子震父能奇子承業俱入京受封焉

大兵之入雲南也諸將封公侯者多降惟寶名望戰死

逸史曰昔者管仲遇盜取二人馬上以為公臣其後晉之戴淵卒為忠義至於草昧之際自盜賊奮為名臣者不可勝數由此觀之草澤何嘗無奇材哉明之末也以科目藉制天下之士之俊雄桀驁不能自致富貴者皆起為賊魁既以毒痛天下濁亂神州矣迨其歸附又不能善撫而用之夫可望始之請王封其志何嘗不願為國用而庸臣必阻格之以激其怒而肆其噬諸諂趨勢利者反導之以僭逆考其人皆出自科甲自附於儒雅者也天厭其惡定國起而反之尊主禮士足以有為矣而朝無忠直奸諛復出而任事迄於不振然

其流離蠻貊之中不忘故主至於籲天自述其志亦足悲矣
以視夫標榜聲華賣國以偷生者論世之士將何所取哉然
則盜賊猶賢於甲科之標榜者也

南疆逸史卷五十二

大興傅氏長恩閣鈔本

南疆逸史卷五十三

烏程溫睿臨撰

列傳第四十九

武臣

荆本徹

賀君堯

黃斌卿

鄭遵謙

鄭彩

阮進

周鶴芝

荆本徹，疏大徹，丹陽人也。甲戌進士，累官下江監軍道。南都之變，悉以家財募士，已而總兵吳志葵起兵，吳淞本徹引兵會之，立義陽王。監國志葵攻蘇州，本徹留輔王志葵，敗。

清帥追至吳淞本徽率麾下力戰不勝走崇明護義陽王入浙東因留定海丙戌還屯舟山小沙巖本徽本不能軍軍無紀律所至擾民時黃斌卿在舟山忌本徽之逼未敢發本徽賤買民米穀民訴於斌卿斌卿故曰我無如之何也然汝良苦與之酒食好言遣之民愈德斌卿斌卿乃密緘民詞送本徽以激怒之本徽不察召答其民民益怒怨久之斌卿知民可用乃召各寨大姓諭之曰荆某虐汝久矣我不能制者以皆王臣也今聞且降

清將引兵大掠舟山擄若子女而以丁男充行伍行伍有日矣若之何大姓大怖叩頭曰唯公所命於是歸以其言遍告百姓人思違志皆曰黃公生我我何敢不出死力斌卿乃起

師合民兵共攻之本徽將士善騎射無不一當百戰三日夜
斌卿欲還有叛將投斌卿者告曰火藥已盡馬力竭矣鼓之
必克斌卿因急攻師遂潰父子兄弟皆遇害夫人以老獲免
斌卿使人送之內地其同邑人賀君堯亦為斌卿所戕

賀君堯字淳宇崇禎末年為溫州參將加都督銜思文即位
挂忠威將軍印其在溫州不戢軍有庠士見忤君堯召辱之
諸生大搦令軍士露刃逐諸生有傷者崑山顧錫時以大學
士召方渡海入覲欲劾其事一夕盜殺之江心寺人以為君
堯所使也衆議愈不服丙戌夏

清兵破溫君堯走海與巡撫盧若騰同棲鎮下關士卒俱散
平夷侯周鶴芝故標將也迎之入營九月同入閩至海壇山

部將歐興為招募洋船得五千餘艘丁亥春護尚書張肯堂
入浙止溫之玉瑤山其故治也傍海有漁稅萬金初夏漁盛
輕重稅之所獲愈贏而半為歐興侵蝕君竟怒籍其舟興恨
將至舟山以書約黃斌卿令圍之斌卿遣劇賊王大用林隆
來迎因擊殺之盡並其船二于光禧光祚勇而有文皆沒全
家死者百口

黃斌卿興化衛人也小字虎癡有智術通文墨善談論父為
北方丞斌卿侍行遇流賊父見害斌卿因客遊與妓劉氏狎
資用乏絕後以恩例當拔把總劉氏罄其囊以助乃得之任
陞舟山參將而劉氏為其妻妬死累官江北總兵南都之亡
解兵道歸隆武即位斌卿進千金助軍上言舟山為海山巨

鎮番舶往來饒魚鹽之利西連越郡北窺長江此進取之地也上喜之封為肅虜伯賜劍印命鎮屯舟山得便宜從事斌卿乃集將佐顧乃德朱國泰朱壽劉國勳等造戰艦積糗糧整立軍營又上疏乞鶴芝以自副芝至為人延納士人招徠商旅斌卿怯於大敵而勇於害其同類嘗出師攻崇明戰敗以周瑞救得還丙戌正月朱國泰敗沒於清村六月浙東陷魯王遁入海靖夷侯王之仁父子率舟師來歸斌卿誘擊之並其眾又敗之仁將張國柱國柱者劉澤清部將也澤清既降國柱率所部走定海投之仁之仁尚任之及之仁敗沒國柱來爭舟山兵多北人號驍勇斌卿自度不能敵令百姓城守而出洋與決水戰三日夜不能當積阮進助因大破國柱

先是張名振扈魯王出海至舟山斌卿不納漂泊外洋國柱
既敗乃劫王妃張氏北去斌卿得其船百艘又奪義師將胡
來貢輜重襲殺監軍御史荆本徹於是拒舟山為持久計語
其左右曰舟山懸絕海外不患敵至我保聚訓練以待時亦
足立國限民年十五以上充鄉兵夫死者妻嫁田入官年六
十無子收其財產別給口糧初舟山田半屬內地至是大戶
不敢渡海盡藉為官田總計官田官居其二民居其一斌卿
意欲盡收之如土司法為不侵不叛之島夷而已丁亥春有
兩王子來域卿使人沈之海取其金帛數萬六月忠威伯賀
君堯來歸又殺之得其船五十隆武出亡乃自署官屬設印
綬生殺黜陟愈任意矣張名振之喪師而歸也斌卿每事侮

之遂去舟山而別營於南海平兩將軍王朝先本王之仁部將斌卿劫之使守西洲渡兩人皆恨斌卿第妻挈在舟山未得間也已丑七月閩地盡陷張名振與阮進迎魯王於沙理至南田攻復健跳所以居之阮進軍饑告糴於斌卿斌卿不應進怒有標將王大振者富於財斌卿數侵之暹朝先所因說曰彼終不利於公公蓋先之朝先乃與名振阮進合兵將攻斌卿先聞於王王亦怒其不奉令也許之斌卿御下少恩衆多不附阮進兵至遣將陸偉朱玖禦之數敗懼而求採於安昌王恭棣大學士張肯堂上章待罪議請和曰彼此皆王臣諸帥不聽九月二十四日陸偉朱玖叛放舟出洋阮進疑斌卿逃縱兵大掠砍傷斌卿縛而沈之臨死見荆本微立其

旁二女從死于世爵名振塔也留名振軍中

逸史曰古人有言曰盜亦有道斌卿欲盜踞舟山乃拒魯王而不納害兩王子不忠滅荆監軍殺賀忠威不義強拒民田不仁侮定西拒蕩湖無禮畜叛臣為部將不智無道甚矣夷滅不亦宜乎若諸人者本足不錄傳其事以為世戒耳

鄭遵謙字履恭會稽人父之尹山西按察使僉事遵謙少喜任俠輕財結客不為繩墨之士所禮與東陽許都為死友名妓金氏一見喜曰豪士也遂耦焉遵謙挑其侍婢金氏殺之諸不逞於遵謙者屬婢家訟於官繫金氏獄詞連遵謙遵謙不出對簿而散千金與金氏日酣飲狂狷中時松江陳子龍司理紹興許都馳謂之曰天下方有事公奈何多殺豪傑子

龍乃出之及許都作亂連陷數縣遵謙謀應之其父局其室不聽出

清兵渡江南都官屬皆逃奄人屈尚忠至紹興左都御史劉宗周曰凡逃官皆當斬也於是分守道于穎繫尚忠以待遵謙出勝殺之曰劉先生有言矣同謀起兵備亂及六月杭州不守紹興通判張懷以城降用為郡守又以彭萬里知會稽縣遵謙乃召故所知少年及郡將告曰天下事尚可為我欲舉義旅何如衆曰唯公命是日集者數千人乃樹燹誓師收張懷及萬里斬之集縉紳議餉尚書商周祚姜逢元等皆至有以家貧辭者遵謙叱之曰若受高官厚祿數十年今國破君亡尚欲擁厚資安享耶驅將出斬之衆股栗乃聽命部署

甫定其父從杭州納款雜髮歸見之大驚扶遵謙叩頭大哭
曰汝幸貸老奴命毋使獲宗遵謙不願絕裾去將迎楚宗室
為王無何魯監國詔至乃遣子懋繩率副將吳明傑以兵三
千迎王王至紹興命遵謙挂義興將軍印賜二品服江上設
守謙遵訊小魯十一月以功封義興伯時子龍亦起兵松江
貽書曰僕真淮陰惡少年不識韓王孫監國軍事主於方國
安王之仁兩人遵謙鬱鬱不得志日以聲色自娛明年六月
師潰王航海隆武遣使召之至閩而帝蒙難漂泊久閩海久
之王次長垣遵謙來謁王甚喜乃依鄭彩以居彩以同姓弟
畜之使領陸兵於半田海中洋船皆統於彩遵謙強取二船
資萬計由是交惡遵謙為人疏誕不能慮患大學士熊汝霖

見害遵謙不平形於辭色彩欲殺之乃偽捷命將吳輝輝扶傷就遵謙求書投鄭鴻遠遵謙入輝船送之被擒輝既擒遵謙而難於面之伏船底不出遵謙呼曰汝鄭彩廝養殺我豈出汝意而相避乎輝出遵謙乞隻雞孟黍哭奠汝霖既畢赴海死金氏時在軍末草像鄭彩每饋食斬草人以侑彩聞之沈之海中江師之潰也其父之尹亦死

逸史曰遵謙之舉得矣而如違其父何曰是不可以責遵謙也何則其父己不義矣父不義而子違之於子乎何尤曰獨不可兩全乎曰可為遵謙者痛哭以諫父奉父以舉事則兩得矣然而必不能也明之紳士大約榮利祿趨聲勢私妻子是計耳園有君父之感家國之感乎哉故閩至則降閩獻至

則降獻一降不止則再其目義士皆怪物耳安得不怒其子哉曰降紳衆耳而之尹獨以子舉事死是非子殺父歟曰是不然當是時義旗四出孫僉事於餘姚張司馬於東陽朱總督於金華錢員外於鄞縣熊給事於紹興師徒雲集即微遵謙之尹能禁他人乎倘從而撓之負惡名而不免於死則不如聽謙道之為得也嗟乎遵謙雖性非忠義而名卒以是傳與夫華衣美食酣豢聲色以老而名湮沒者有異矣

鄭彩芝龍族姪也劍眉長髯儀狀魁碩有智略與諸將異鴻達奉命守江彩亦以總兵官守采石隆武立遣守杉關封永勝伯後以兵敗降封恩宥伯丙戌秋魯王出海欲依黃斌帥斌卿不納漂泊外洋彩適至舟山遂奉王南入閩芝龍已降

北間彩護王屢書勸其執王自歸彩不聽丁亥進封建國公
其弟鄭聯為定遠侯陶海舟皆出鄭氏門下自芝龍北去成
功居南彩威名遂盛戊子奉王駐福_州大學士劉中藻方
復福_州欲迎王彩與之忤反掠其地致百姓怨叛中藻敗沒
後與王有隙己丑棄王南去王依阮進得適舟山庚寅與鄭
成功構釁成功擊走之襲執其妻子成功祖母責其孫善遇
之得釋還秋北至武環山欲爭平夷侯地相攻殺者累日後
阮進助平夷彩遂敗走始閩安周瑞蕩胡阮進皆彩義子也
平夷侯則稱門生者也至是互相攻殺惟力是視矣彩漂泊
海中無所適成功以書招之乃歸死於家云

阮進號大橫閩之航工也嘗掠海上能以少擊衆熟諳水性

張名振拔之使蒞水營浙東兵潰定海總兵張國柱駕樓船
四百規取滄州黃斌卿求援於名振方出戰進率艤艘突入
國柱營礮聲雷鉤波濤沸起而國柱大敗滄州人德之進加
參將然斌卿為人猜嫌賴名振力出險不以為德反忌其威
勢出己上說進使背名振進亦欲自為一軍乃取其二十艘
資數萬移師琅琦丁亥正月魯王次中左所禡牙出師進以
兵來會封蕩胡伯自是與名振抗衡矣八月從攻福州己丑
夏閩地盡失進復與名振迎王沙埕取健跳所居之七月
大兵圍健跳所名振城守將破危甚進率水營百餘艘自海
外至城中聞之婦女皆踴躍出乘城鳴金擊鼓聲振天地田
帥拔營去久之進軍中乏食自念昔有保滄州功告糴於斌

卿不許張肯堂謂斌卿曰監國漂泊海中公不能奔問官守
蕩胡昔有德於我今違其請內負名義外樹強敵公不慮後
患乎不聽進遂與名振王朝先以王命討斌卿遂殺之辛卯
大兵攻渝州進自海門返遇金帥於橫水洋以火球擲其舟
風轉反擊進而進創甚投水死

周鶴芝字九玄福清人也曾祖某嘉靖中僉都御史芝饒機
智有膽略善射少與周之夔林正亨同學後棄去射獵釣魚
落拓遊四方已乃與番舶賈人貿易儕輩聽其指揮久之遂
劫掠為盜徒眾驍勇與劉香鄭芝虎齊名芝不殺人貨僅分
其半海上謂之仁盜嘗微行歸家為有司迹捕繫獄三年賄
吏得脫變姓名為盜如故年幾四十見天下將亂慨然語其

屬曰大丈夫乘時立功及筋力尚壯當為朝廷用奈何作此不義事耶分財給之率就撫大吏請於朝授黃華嚴把總譏察商船乙酉秋思文帝加水軍都督副黃斌卿鎮舟山乃率其弟周瑞副將翁長盛劉順等列營與斌卿犄角時海上方苦斌卿之暴而芝禮賢下士通商旅來百貨人翕然歸之鶴芝少時嘗往來日本與撒斯瑪王結為父子日本三十六島島各一王以奉國主國主居東京擁虛位而已政令聽之撒將軍撒斯瑪於諸島為最強與大將軍相親芝既熟日本故往來海中無不如意至是遣人至撒斯瑪訢中國表亂願假一旅以濟軍大將軍慨然許以明年四月發兵三萬並給中華軍資器械自長琦島至東京三千餘里修橋道葺驛館以

待使臣鶴芝大喜益賂以珠璣玩好遣參將林翰舞為使將發斌卿忌其功止之曰世宗朝倭患之中於南土者二十年至今老父猶畏其名今乃欲引賊入門耶芝怒而入閩加平海將軍六月尚書張肯堂將出師奏為前將軍會芝龍阻師乃悉以軍器火藥付鶴芝令先發七月進至沙埕時浙東已失魯王出走遂破蒲門所拒鎮下關謀取溫州九月聞延平陷上遇害引兵南還福建既破鄭芝龍劫衆議降芝涕泣諫曰鶴芝海隅亡命耳無所顧惜尚不肯輕棄成業明公二十年威望播於海宇士卒精強府庫充實進可以扶明室成中興之功退則自王亦不失為一州主奈何信狙詐之言負名義入險地萬世基業墮於一旦為天下笑芝不忍見公之有

此也請得効死於前以明不欺抽刀自刎芝龍起尊之後數月芝龍竟去丁亥三月克海口鎮東遣其義子林皋隨安昌王至日本乞師不得其要領而還四月鎮東復失參將林嵩歸總兵翁長盛趙收等敗沒嵩歸福建人收常熟人皆芝客也芝龍之降也嵩舞陳八不可勿聽收有勇力朱永祐使將見芝龍而刺之亦不果至是守鎮東收出戰所殺傷過當敵來愈衆遂不支戊子魯王封為平夷侯移鎮沙埕督師劉中藻之復福圖也兵甚盛芝以水師助之溫台響應己丑中藻敗芝北拒玉球三盤諸山開黃華關魯王駐滄州遙為聲援庚寅與其弟閩安侯瑞不和魯王命杭人吳明忠往解之構之愈甚瑞南依鄭彩而芝北依阮進助之攻瑞卒敗去辛卯

詔守羊瞿等山以糧少為張名振所阻芝自是無經略四方之志矣後不知所終始鶴芝之乞師日本也見阻於斌卿其後御史馮京第謂斌卿曰前亂我邊者海盜耳今我乞師於王何害斌卿乃使其弟孝卿住京第往至長琦島其王方與西洋構兵甫戒嚴而京第至不得入京第朝服哭拜於舟撒斯瑪王聞之謂大將軍曰我不能恤中國亂而使其使臣哭於我國我之恥也會東京方遣官行命如中國之巡方者京第因致書乃得入館議發各島罪人以應京第先還日本致洪武錢數十萬孝卿留與諸官妓狎樂而忘歸其國輕之發師之意而怠己丑冬有僧湛微者自日本來為蕩胡伯阮進言之且曰師可得也而中國之聘薄彼國饒金帛未足動也

誠得普陀山慈聖李太后所賜藏金經為贄則兵必發進與
定西侯張名振上疏監國復遣京第往以澄波將軍阮美為
副王親賜宴十一月朔出普陀十日至五島山與長琦島相
踞一程是夜大風黑浪兼天兩紅魚乘空上下船不知所往
十二日見山舩工驚曰此高麗界也轉帆而南又明日乃進
長琦召通事諭以來旨其王聞之大喜已知船中有湛微則
大驚始湛微之在日本也依南京寺住持如定為弟子如定
通文墨國人重之湛微能不逮其師而狡獪多變乃別居膜
泉島自行其惡札未署白金獅子尊者其流傳東京大將軍
駭曰此必西洋人之為天主教者急捕之已知江西僧也乃
逐之過海日本法不殺大唐僧有犯止於逐再往則戮及同

舟湛微欲以此自結於日本幸依中國使臣得不誅阮美於是知為所賣也遂載經而還湛微愧自投於水京第救之歸營進又欲殺之京第不可載往荒島然日本承平日久故老不見兵革本國且忘備豈能渡海為人復讎乎說者謂宋之亡也張世傑嘗遣使海外某國借兵陳宜中亦身至占城岷山既陷兩國之師同日至不戰而返芝等之舉何以異此忠臣義士計無復之不得已計功於萬一徒以利害相權者陋也

逸史曰鄭彩以下皆海盜也君子何取焉取其猶知王室且以芝龍之寵貴一旦棄其君而不顧况彩等乎之數人者非素有位於朝有職於身也倉猝招來相依不去及乎大數已

失國統再絕魯王漂泊靡有定止彼逆臣者說以執王圖富
貴而彩猶不忍不猶賢乎哉惜其奉主不終也進以死勤事
芝乞師絕域其志皆可悲者嗟乎明臣之愧海盜者衆矣

南疆逸史卷五十三